

# خَطِ پُولُسِ بَلَدِه فِلِيمُون

## پیشگفتار

فِلِيمُون یگ ایماندار بُود و اِمکان دَره که یکی از اعضای جماعتِ ایماندارای شارِ کولسیه بُوده بَشه. اُو یگ غلام دَ نامِ اونیسیموس دَشت که از پیش شی دوتا کُدد و یگو چیز شی ره ام شاید قد خو بُردد. مُطابقِ قانونِ رُوم جزای ازو کلو سخت بُود. دَ امزو زمانِ پُولُس دَ بَندي خانه بُود و اونیسیموس قد ازو آشنا شد و دَ وسیله ازو دَ عیسیٰ مسیح ایمان اُورد.

دَ امزی خط، پُولُس از فِلِيمُون خاهش مونه که اُو اونیسیموس ره دَ عنوانِ برارِ عزیز خو قبول کنه و قد ازی کارِ دل-و-جانِ پُولُس ره تازه کنه.

## فهرستِ عنوانِ ها

دُعا و سلام (آیه ۱)

شُکرگزاری و دُعا (آیه ۴)

خاهشِ پُولُس از فِلِيمُون (آیه ۱۰)

## دُعا و سلام

<sup>۱</sup> از طرفِ پولس، که بخاطرِ مسیحِ عیسیٰ بِنَدیِ اَسْتُمْ و از طرفِ برارِ مو تیموتائوسِ بلدهِ دوستِ عزیز و همکارِ مو فلیمون <sup>۲</sup> و بلدهِ خوارِ مو اَپفیه و بلدهِ همسنگرِ مو اَرخِیپس و بلدهِ جماعتِ ایماندارای که دَ خانهِ تُو جمِ موشه: <sup>۳</sup> فِیض و سلامتی از جانبِ آتِهِ مو خُدا و مولاِ عیسیٰ مسیحِ نصیبِ شُمو شنه.

## شُکرگزاری و دُعا

<sup>۴</sup> وختیکه تُو ره دَ دُعا های خُو یاد مُونم، همیشه خُدا ی خُو ره شُکر-و-سپاس مَوگیم، <sup>۵</sup> چراکه دَ باره ایمان تُو دَ مولاِ عیسیٰ و مَحَبَّتِ تُو بلدهِ تمامِ مُقَدَّسینِ مِیشتنوم. <sup>۶</sup> دُعا مُونم که شریکِ کدونِ ایمان تُو قدِ دیگر و تاثیرگذار شنه، تا تمامِ خُوبی های ره پی ببری که دَ وسیلهِ مسیحِ دَز مو وجودِ دَره. <sup>۷</sup> آی برار، مَحَبَّتِ تُو خوشی و دلگرمی کلو نصیبِ مه کده، چراکه دلِ های مُقَدَّسینِ دَ وسیلهِ از تُو تازه شده.

## خاهشِ پولس از فلیمون

<sup>۸</sup> پس، اگرچه دَ وسیلهِ مسیحِ جُرأت کده میتنم که دَ بِلِه تُو حُکم کنم تا وظیفه خُو ره انجام بدي، <sup>۹</sup> لیکن دَ اساسِ مَحَبَّتِ از تُو خاهشِ مُونم. ما، پولس که یگ آدم پیر و فعلاً بخاطرِ مسیحِ عیسیٰ بِنَدیِ اَسْتُمْ، <sup>۱۰</sup> دَ باره باچه خُو اونیسیموس که دَ دورونِ بِنَدیِ گری ما آتِه روحانی ازو شُدُم، از تُو یگ خاهشِ مُونم. <sup>۱۱</sup> او سابقِ بلدهِ تُو بے فایده بود، ولی فعلاً ام بلدهِ از تُو و ام بلدهِ ازمه فایده مند آسته. <sup>۱۲</sup> او ره که دل-و-جان مه آسته، دَ پیشِ از تُو پس ربی مُونم. <sup>۱۳</sup> ما میخاستم که او ره دَ پیشِ خُو نگاه کنم تا دَ دورونی که ما بخاطرِ خوشخبری بِنَدیِ اَسْتُمْ، دَ جای از تُو بلدهِ مه خدمت کنه، <sup>۱۴</sup> لیکن نخاستم که بدونِ موافقتِ از تُو کُدم کاری کنم تا نیکی-و-مهربانی تُو از رویِ مجبوری نبشه، بلکه از رویِ رضایت بشه. <sup>۱۵</sup> شاید دَ امزی دلیلِ او بلدهِ یگ وختِ کم از تُو جدا شد تا که تُو او ره بلدهِ همیشه قد خُو دشته بشی، <sup>۱۶</sup> مگم نه مثلِ یگ غلام، بلکه بالهتر از یگ غلام، مثلِ برارِ عزیز. خصوصاً بلدهِ ازمه او عزیز آسته، ولی بلدهِ از تُو کلوتر، ام از نگاهِ انسانی و ام دَ خدمتِ مولا. <sup>۱۷</sup> پس اگه مره همکارِ خُو میدنی، امو رقم که از مه پذیرایی مونی ازو ام پذیرایی کو. <sup>۱۸</sup> اگه کُدم غلطی قد تُو کده بشه و یا کُدم چیز از تُو قرضدار بشه، دَ پای ازمه حساب کو. <sup>۱۹</sup> ما، پولس، قد دِستِ خود خُو امی ره نوشته مُونم: "ما او ره آدا مُونم." <sup>۲۰</sup> البته نَموگم ام که تُو حتی جان خُو ره از مه قرضدار آستی. <sup>۲۰</sup> آره، آی برار، امیدوار اَسْتُمْ که امی فایده تُو دَ نامِ مولا دَز مه برسه. پس دل-و-جان مره دَ نامِ مسیحِ تازه کو. <sup>۲۱</sup> ما بخاطرِ اعتمادی که دَ اطاعتِ تُو دَرُم، ای ره نوشته مُونم و

میدنم که حتی کلوتر از چیزی که تقاضا مونم، انجام میدی. <sup>۲۲</sup> علاه ازی، یگ اُناق بلده مه آماده گو، چون امیدوار  
استم که د وسیله دُعا های شمو دوباره د پیش شمو اُورده شنم. <sup>۲۳</sup> ایپفراس که بخاطر عیسی مسیح قد ازمه قتی  
بندی آسته سلام زبی مونه، <sup>۲۴</sup> امچنان همکارای مه مرقس، ارسترخس، دیماس و لوقا. <sup>۲۵</sup> فیض مولا عیسی مسیح  
قد روح شمو بشه.